

O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA OKETOPA 2025

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

OSIGA FEAGAIGA EFKS VAILOA UTA, FALEATA



Susuga Faasavala Leilua FT, Tavita Jr Pulu FS & Naomi, Fili Si'a FT @ EFKS Vailoa uta.



**Nisi o Tama Uli i le sauniga lotu o le
Poloketi Onesemo @ Maota o Tupulaga**



Susuga i le Toeaina Penisione
Rev. Elder Lucky Richard Slade



9 Aukuso 1948 - 25 Setema 2025

**Toeaina Penisione ua maluu,
Susuga Lucky Richard Slade FT**

O LE FAASINO UPU

- | | |
|------------------------------|----|
| 1. O LE LAUGA | 2 |
| 2. LOTU TAMAITI 127 | 4 |
| 3. A'OA'O MO MALUA 2026 | 4 |
| 4. PEPA MAFUTAGA FAAFOUINA | 5 |
| 5. OSIGA FEAGAIGA VAILOA UTA | 7 |
| 6. O LE PEROFETA MULIMULI | 8 |
| 7. O LE POLOKETI ONOSEMO | 12 |
| 8. O AU AFIOGA O LE SULU | 14 |
| 9. O E UA MALILIU: | 15 |

Leota Philip Wilson TK

- | | |
|----------------------|----|
| 10. ATA O TALA LOMIA | 16 |
|----------------------|----|
-

O LE LAUGA

Tusi Faitau – Iuta: 1: 1 – 4

Matua – Iuta 1: 3 – “Le au pele e, o loo ou matua faamalosi e tusi atu ia te outou i le faaolataga ua tuu tele, ua tatau ai lava ona ou tusi atu ia te outou, e apoapoi atu ia outou faamalolosi ona finau mo le faatuatua na tuuina mai faatasi i le au paia”.

Manatu autu – “Finau mo le faatuatua” (*Contend for the faith*)

Fa'atomuaga:

I le vaaiga fa'alotoifale i le Tusi o Iuta, e i ai le talitonuga sa tusia i le vaitau o le 66 i le 80 TA. O taimi aupito sili ona pogisa o le talafa'asolopito o le “ULUA'IEKALESA”. Taimi o sauaga mamafa, i lalo o le malosi o le “LIMA U'AMEA” o le “MALO O ROMA”. Aemaise o le tele o “FAIAOGASESE” ma a latou “A'OA'OGASESE”.

O le tusi e le o fa'apito augafa mo se Ekalesia po o se fa'apopotoga o tagata. A o le tusi e mo Kerisiano uma o loo taapeape i le lalolagi. O le fa'amoemoe lava o le tusi se'i avatu se “FA'AMOEMOE OLA” – “GIVE THEM HOPE”. “FA'AMAFANAFANA” – “COMFORT”. A o se “FA'AMALOSIAU” – “ENCOURAGEMENT”, e tusa ma lo latou gapatia. Ia “TUTUMAU” ma “FINAU MO LE FA'ATUATUA”.

Feagaiga Fou:

Amata a le tusi i le fa'alauiloa o “IUTA” – “O LE AUAUNA A IESU KERISO”, o le “USO FOI O IAKOPO”. A fesiligia po o ai “IUTA”? E lua (2) “IUTA” o loo ta'ua i le Feagaiga Fou. O “IUTA LE SEKARA”, le soo na ia fa'alaitaina “IESU”. Sa motu lona gafa ina ua alu ese ma le “ALII”.

A e i ai le talitonuga o “IUTA” le uso o “IAKOPO”. O uso o le Alii o Iesu. O le talitonuga ta'atele, o “IUTA” lea na tusia le tusi lenei. E uiga tutusa ma “IUTA” lea sa fa'aigoa ai le nu'u o le “ATUA”. O le uiga o le igoa o “IUTA” – “VIIGA” – “PRAISE”. O “IUTA” o le nu'u sa valaauina e maua ai le viiga o le “ATUA”.

O le nu'u sa fa'amamaluina e le “ATUA”. A o i foi lea e ala ai ona fa'apea upu tomua a “IUTA” O a'u o “IUTA” o le “AUAUNA A IESU KERISO”. O le “AUAUNA” e sau mai upu Eleni o le “*doulos*”. O lona uiga, o le “POLOGA” – “BONDSLAVE”. Ai sa manatu “IUTA”, i le ola pologa ma le pa'u maualalo sa i ai i le agasala. Lea ua fa'asa'olotoina ma faaolaina e Iesu.

O lona fa'atuatua, o le ala lea o le tu'umauualalo e “IUTA” ia, ina ia fa'amauualugaina le viiga o le “ATUA”. Fa'aiti e “IUTA” ia lava, ina ia fa'aofi gofie le “TALALELEI”. A o foliga vaaia lena o le tagata e “FINAU MO LE FA'ATUATUA”. Fa'amauualalo teisi ifo, a e fa'asili LE ona le “FEAU” ma le “GALUEGA”. Ona agai lea o “IUTA” e tositosi matamata tetele i latou o aga'i ai lana fa'atofalaiga.

Fai mai “IUTA” – o e ua “VALAAUINA”, ua “ALOFAINA E LE ATUA LE TAMĀ”, ma “LEOLEOINA” mo “IESU KERISO”. O ai i latou ia? E i ai le talitonuga, o le “EKALESA A LE ATUA”. O e ua “FA'AOLAINA” ma “FA'APAIAINA”. O e ua filifilia fa'apitoa e ala i le talia o le “FA'AOLATAGA” ia “IESU KERISO”.

Le “TALALELEI” lena o le “ALOFATUNOA O LE ATUA”, ua tu'utele. Sa tala'iina atu e le “AU-APOSETOLO”. O i latou o e “TUTUMAU” ma “FINAU MO LE FA'ATUATUA”. Fai mai Iuta, “*Ia fa'ateleina ia te outou le alofa mutimutivale ma le manuia, ma le alofa*”. “MERCY”/ “BLESSING”/ “LOVE”.

O le upu Eleni o lo’o fa’aaogaina e le tusitala o le “*plēthunō*”. O lona fa’aperetania, o le “INCREASE”/“MULTIPLY”/“ABUNDANCE”. Lea e fa’aliliu mai ai le upu “FA’ATELEINA”. A o le “FA’ATELEINA”, fai mai nisi o le au-suesue e mafua ona o le “ATUA”.

O “FA’AMANUIAGA” mo le tagata e “FINAU I LE FA’ATUATUA”. O le upu foi lea o lo’o fa’aaogaina e le tusitala o Mataio, o lo’o i le mataupu e 6: 33.....”*Ia outou mua’i saili le “ATUA” ma lana “AMIOTONU”, ona fa’aaopoopoina atu lea o mea ia te outou*”. O lona uiga, e “FA’ATELE” e le “ATUA” mea e tele mo le tagata.

Le tagata e “FINAU MO LE FA’ATUATUA”. E maua le “ALOFA MUTIMUTIVALE” – “MERCY”. E maua “FA’AMANUIAGA” – “BLESSING”. E maua le “ALOFA” – “LOVE”. O le alofa mutimutivale, o le meaalofoa foai fua mo le tagata e faia le finagalo o le “ATUA”. O fa’amanuiaga, o meaalofoa a le “ATUA”, o ona tamaoiga i so’o se auala mo le tagata fa’atuatua. O le alofa, e lautua ma tau ai mea uma i lona alofa i le tagata fa’atuatua.

Ona aga’i lea o “IUTA” e apoapoa’i mai i le “AU-FA’ATUATUA” ma le “AU-PAIA”. Ia “FA’AMALOLOS I ONA FINAU MO LE FA’ATUATUA”. Ia mataala i tagata o lo’o fetinaia’i ai le “OLAFA’ATUATUA”. O tagata fa’aleiloga. O tagata lava o lo’o ola i le fa’asala. O e ua ola fa’alemata’u. O e ua taumafai e liua le “ALOFA TUNOA O LE ATUA” i tuinanauga o le tino. O e ua fa’afiti i lo latou matai o “IESU KERISO”.

O ituaiga tagata ia latou te le’i talia le “FA’AOLATAGA” ia “IESU KERISO”. O lo’o ola pea i tuinanauga o le tino. O le ala lena o lo’o tete’e ai i le talaiga o le “ALOFA TUNOA”. Ua latou fa’afiti foi ia “IESU KERISO”. O lo’o latou tala’iina e tusa lava pe ua fa’aolaina le tagata, e ola lava fa’alelalolagi.

Ua ama la latou vaai i le “FA’AOLATAGA UA TU’UTELE”. Le “FA’AOLATAGA E ALA I LE ALOFA TUNOA O LE ATUA IA IESU KERISO”. A o le auala lea ua “FA’AOLAINA” ma “TA’UAMIOTONUINA” ai i latou o e “FA’ATUATUA”, “TALITONU” ma talia.

O tagata uma o e fa’atuatua ma talitonu i ai, e “FA’AOLAINA”.

O tagata ua suia mai le olaga tuai. Le ola agasala. Ua talia “IESU KERISO” ma “FA’AOLAINA” ai. O le “ALOFA TUNOA O LE ATUA”. Ua sa’oloto ai le lalolagi uma mai le amo ma le pologa o le agasala. Ua le toe ola fa’aleiloga ai ma ola ai i le fa’asala. Ua le toe i ai se ola fa’alemata’u. Aua talia le “ALOFA TUNOA O LE ATUA”, fultua i tuinanauga o le tino. Fa’afiti i le lalolagi, ae talia lo latou matai o “IESU KERISO”.

Feau Fa’amalosia:

Le atunuu e Samoa ma le “EKALESIA” pele a “IESU KERISO”, o le feau lea o le Talalelei mo oe ma a’u ma i tatou uma. O le taugologolo a le Talalelei.....”IA TATOU TUTUMAU MA FINAU MO LE FA’ATUATUA” pei ona a’oa’oina ai tatou mai le amataga.

O le “FA’ATUATUA” i le “FA’AOLATAGA I LE ALOFA TUNOA O LE ATUA IA IESU KERISO”. Pau a lea o le auala e “FA’AOLAINA AI”. O le “FA’ATUATUAGA FA’A-EFKS, e o fa’atasi le “FA’ATUATUA” ma “GALUEGA”. O le “FA’ATUATUA” lea sa tutumau ma finau mai e o tatou tuua ua lagomau mai tiasa.

Sa tamamau ai foi le “AUFAIGALUEGA FAIFEAU” ua fai i lagi le folauga. Lea lava o lo’o tauave e o tatou matua ma i tatou i nei onapo. O le fa’atuatua e o fa’atasi ma galuega. Pei ona fai mai o “IAKOPO”.....*Iakopo 2: 14 – “O’u uso e, se a le aoga pe a fai mai se tasi ua ia te ia le fa’atuatua, ae leai ni galuega. E mafai ea e le fa’atuatua ona fa’aola ia te ia”*.

Tele talaiga ma lotu eseese i nei onapo. Ua fetineiaina ma fa’aluafesasi ai le ola fa’atuatua o tagata. Ua fa’apea ai nisi o o e sa’o, a o iinei e sese. Ua fa’apea foi nisi, a na ou le sau a iinei ou te le maua “IESU”. Ua fai ma alofaaga le ola ma le soifua galue. Ona agai lea e saili le lotu e eva ai i le laufau malū.

Ae ala foi ona tusitusilima mai nisi i le EFKS, ona o loo ola fa’aleiloga lava nisi. O lo’o ola lava foi nisi i le olaga tuai. Ua ola i le fa’asala. Ua ola fa’alemata’u.

O le fa'aailoga o le fa'afiti ia "IESU KERISO". Ua teena le "ALOFA TUNOA O LE ATUA". O le mea e maua fua. Tau a o le "FINAU I LE FA'ATUATUA".

EFKS – TATOU FINAU MO LE FAATUATUA. Tatou galulue pea lava foi, e leai se afu e pa'ū fua. E le o se mea faaleaoga lo tatou tautiga mo le "ALII". O galuega lelei uma, o faigataulaga, tatou ave e fai ma viiga o lona Suafa. E le pine ona manuia lau fanau. Manuia lou aiga. Manuia lou nu'u. Manuia le atunuu. Ae sili ona tupu ma ola le Talalelei a "IESU KERISO" i le ola nei.

Kerygma:

O "IESU KERISO", sa "FINAU MO LE FAATUATUA" i lona "TAMĀ" ina ia taunuu lana misiona, o le "FAAOLATAGA" mo le lalolagi uma.

Sa fa'asatauroina, sa maliu ma tanumia, a e na toe soifua manumalo mai le oti ma le tuugamau, ina ia fa'aolaina oe ma a'u le tagata agasala. E le fai ea lea mo i tatou.

Ia manuia tele ona o "IESU" Amene.

Saunia susuga Peter Gafa Lokeni (FS)
EFKS Fa'atoialemanū, Pulega Apia Sasa'e
MATAGALUEGA APIA

LOTU TAMAITI 127

O le Lotu Tamaiti o le tausaga nei, o le lona 127 lea, talu ona faia. E faamanatu pea mo le silafia le tala faasolopito, o le Fono Tele a le LMS ia Me 1898, na pasia ai e faia se Aso Sa faapitoa mo le fanau, ma amata ai loa lava i le Aso Sa mulimuli o le masina na sosoo ai, Iuni 1898. A o le Fono Aoao Faavaomalo Aoga Aso Sa i Roma, Fepuari 1909, na pasia ai e faailoga le Aso Sa mo Tamaiti o le Lalolagi i le Aso Sa lona tolu o Oketopa, ma sui atu ai loa i ai le Aso Sa Tamaiti a le LMS. Mulimuli ane ona toe suia lea i le Aso Sa lona lua o Oketopa e oo mai nei, ina ia o gatasi ma isi Aso Sa faapitoa, e faia i Aso Sa lona lua o masina - Aso Sa Tina ia Me ma le Aso Sa Tama ia Aokuso.

O le Aso Gafua, aso malolo o le Lotu Tamaiti, e faailoa mai ai le l'uga o le Suega Ulufale i Malua i tausaga taitasi. O le tausaga nei, e 29 i latou sa faamanuiaina i le Suega Ulufale mo Malua i le 2026.

A'O A'O MO MALUA 2026

SUAFA

MATAGALUEGA

- | | |
|-------------------------------|------------------------|
| 1. Alfanzo Malo Na'otala | Faleata |
| 2. Atimalala Ola | Niu Sila i Saute |
| 3. Bonhoffer Fotuaava Sakiasi | Faasaleleaga |
| 4. Cyrus Moamoa Liu | Faleata |
| 5. Elia Paese | Apia |
| 6. Esera Peniamina Finauga | Faleata |
| 7. Faasisila Palale | Apia Sasa'e |
| 8. Herman R. Enosa | Falealili Safata Siumu |
| 9. Iakopo Iakopo | Niu Sila i Saute |
| 10. Ioritana Tusa Soifua | Laumua o Aotearoa |
| 11. Lemi Suisala | Vaimauga |
| 12. Laauli Pulu | Malua |
| 13. Martys Motuga Matagi | Aana |
| 14. Max Lia'i Poufa | Niu Sila i Saute |
| 15. Misipati Kome | Faasaleleaga |
| 16. Musu Auvaa | Apia |
| 17. Obert Amasone Tuisuga | Vitoria |
| 18. Penitito Anoi Keresoma | Aukilani |
| 19. Pelesara Pelesara | Manukau |
| 20. Punaotala Iakopo | Lotofaga Lepa Aleipata |
| 21. Salamo Tuifao | Kuiniselani i Saute |
| 22. Seunuu Leleimalefaga Mau | Niusaelese |
| 23. Shalom Alatina | Faleata |
| 24. Sue Masalosalo Talaese | Apia |
| 25. Taeoiatua Tuiaviti | Niusaelese i Sisifo |
| 26. Taua Lauina Taua | Faleata |
| 27. Tavete Muavae Leifi | Lotofaga Lepa Aleipata |
| 28. Tootai Allen | Niu Sila i Saute |
| 29. Vaipanoa Malaga | Faleata |

O le TA'UTINOGA, Aso Lua 13 Ianuari 2026.

O Tamali'i Samoa Ma Lo Latou Sao I Le Tau Amataina O Le Ekalesia

Matagaluega o le Tala Faasolopito o le Ekalesia

Kolisi Faafaifeau i Malua

Pepa Mafutaga Faafouina 2025

Faatomuaga

Tulouna lava! Le paia o lenei mafutaga mamalu i le Susū o le Susuga i le Taitai o le Mafutaga o lenei aso, Susuga i le Toeaina, le saofaiga malu a Tama o le Ekalesia, Susuga i Toeaina Faatonu, Susuga i Toeaina, faapea Susuga i Faafeagaiga o le au faigaluega tofoti o le Talalelei. Malo le pale, malo le mafuta. Matou te faatalofa atu i le suafa manumalo o lo tatou Alii o Iesu Keriso, le Ao o le Ekalesia.

O le ma faasoa ma le Susuga i le Faiaoga ia Frazer Tauaivale, o le toe faamati'eina lea o sao o nisi o tamalii Samoa, i le galuega talai o le Talalelei, i le tau amatamataina o le Ekalesia i Samoa nei ma le vasa Pasefika. Auā foi o le sao tāua o nai o tatou tagata Samoa, e mafuli lava i le tatanu i tusitusiga a tusitala o le Talafaasolopito mai Europa. O tamalii la o le a faaaui i ai le ma faasoa i lenei aso, o Sooalo Laupue Agaimalo o Samauga ma Tuilaepa Esekia Matetau o Manono. Ua mafua ona ma filifilia nei tamalii, ona e i ai nai feteenaiga o faamaumauga a papalagi ma le au su'esu'e o le Talafaasolopito, i a la galuega mo le tau amatamataina mai o le Ekalesia Kerisiano i Samoa nei ma le vasa Pasefika. O le a vaevaeina lenei tautalaga i ni vaega se lua; o a'u o le a talatalaina atu le sao o le tamalii ia Sooalo Laupue Agaimalo, a o le Susuga ia Fraser, o le a talanoa atu e tusa ma le sao o le tamalii ia Tuilaepa Esekia Matetau, i le galuega a Keriso.

Sooalo Laupue Agaimalo (Sualo)

Sooalo le Misionare

E Tusa ai ma Faamaumauga a Misi ma le Au Suesue o le Talafaasolopito.

O Sooalo poo Sualo e iloa ai i tusitusiga a misionare, o se tamalii mai le afioaga o Samauga i le motu o Savaii. Ua iloga lona suafa i le Talafaasolopito o le Ekalesia i le motu o Efate (poo Fate) i Vanuatu, auā o ia lea na faatoai i ai le taunuu atu o uluai misionare o le LMS, i le tausaga e 1845.

O le malaga lea o le malaga faamisionare lona lima (talu mai le malaga muamua lea na tagatavaleina ai Ioane Viliamu i Eromaga i le 1839) mo motu o i le

Atu-Sisifo o le vasa Pasefika. O le malaga fa'aauau e molimoli le Talalelei ma asia misionare Samoa ma isi misionare o le atu Polenisia, o faapena ona fitaituga i le galuega talai. Na muai afea e le malaga Rotuma, Tana, Aneituma, na ui ane foi i Fotunna ma Eromaga, a e lei mafai ona tulaualelele ona o le matamataita o tagata o ia motu.

A o i ai le malaga i gatai o Eromaga na faalatalata ane le vaa ta asi (sandalwood merchant ship) na i Efate ma faailoa ane i misionare, le alii o Sooalo ma tagata Samoa ma tagata Toga o aumau i le motu o Efate ma lo latou manao mo ni misionare Samoa. Aua na logo tala i misionare na i isi motu o Vanuatu ma le latou talaiga o le Lotu Fou. Ia ma sa faapena foi ona faamatala i ai e alii vaa o le vaa ta asi, le tulaga ua i ai Samoa ma le tapuaiga Kerisiano. Ma na naunau le alii o Sooalo, e fia iloa atili le Atua ua tapuai ai Samoa, ma ofo lana fesoasoani mo misionare mai Samoa. O le tala lea na faasaga ai loa le vaalotu mo Efate, o le Aso 1 Me na taunuu ai i gataifale o Efate le malaga ma sailia loa Sooalo.

O loo faamatala auiliili e le Susuga Oka Fauolo ma le lipoti a Misi Tana (Turner) ma Misi Mare (Murray) o i le Sulu Samoa o le 1845 le taunuu atu o le malaga ma le sailiga o Sooalo, e alii misionare o Setefano ma Leiataua ma se alii Niu Sila (o se tasi o le auvaa o le vaa ta asi) na aumau i le fale o Sooalo i Efate mo sina taimi. Na latou o i uta i le nuu o Sooalo, ma aami ma aumai ia te ia i le vaalotu e feiloai ma fetufuai ma le aumalaga e faatatau i uiga o tagata o le motu. I le mae'a ai o lea feiloaiga, na agai loa i uta le malaga aua le amataina o le galuega talai o le Talalelei.

O le aso muamua o Me i le 1845, o loo faailogaina pea e tagata Efate na taunuu ai le Talalelei i o latou laufanua ma loo faamanatuina ai foi ma le tāua o le sao o Sooalo i le totōina o le fatu o le Talalelei. E tusa ai ma faamaumauga a Misi Tana ma Misi Mare o i le Sulu Samoa, o Sooalo o se toa Samoa na folau mai ma le pasese e 50 (o tagata Toga ma tagata Samoa) mai Palauli mo Toga, i le mae'a ai o le taua i Ātua.

E manatu le Susuga Oka Fauolo, o le taua i le va o Mataafa ma Malietoa ma Tamafaiga i le vaitau o le 1825 agai mai i le 1829, sa matagia le faigamalaga ma a'e ai i le tasi motu o Efate, e igoa ia Tongoa.

Fai mai sa fetaiai ma le maemaeā o tagata o lea motu, ma e lei umi na nonofo ai, aua sa faasagatau atu pea tagata o nuu ma motu tuaoi. Na taumafai foi e toe folau mo Toga faapei ona uluai fuafuaina mo le malaga, ia a e toe matagia foi le malaga ma tulaeleele ai i le motu o Efate. Na maliliu nisi o le faigamalaga i taua faapea faamai. O loo taua e Fauolo nisi o suafa o le au malaga, na faapena ona faamauina e Misi Tana ma Misi Mare.

Na iloga le faigofie o le totoina o le Talalelei i Efate, ma na faafiafiaina ai Misi Tana ma Misi Mare. Fai mai Misi Tana, o le aao lava o le Atua na tuua ai Sooalo i Efate mo le faamoemoe o lana Talalelei. Mafua ona faigofie le galuega a misionare, ona ua iloga tala i le motu o Efate i le toa o Sooalo. O ia na lolofi ane ai alii o le motu e tauina a latou taua, ma e leai se itu taua o tagata o le motu na faia ai Sooalo ma lana au tau. O le mea foi lea e lei fia lotea ai e se tasi o le motu, misionare, aua e fefefe uma ia Sooalo. E lelei foi ma mafana sootaga a Sooalo ma alii o le motu. Ae le gata i lea, sa fai Sooalo ma sooupu, e faaliliuina le Talalelei i le va o misionare ma tagata Efate. Ao lei o ese mai Misi Tana ma Misi Mare, na tuua misionare Samoa e amata le galuega i lalo o le faamalumaluga ma le puipuiga a Sooalo; o Setefano ma Mose i le pitonuu o Sooalo, a o Sipi ma Taavili i le pitonuu i le isi pitonuu, i le vaaiga a le alii o Talakolako.

E lei toe tele ni faamatalaga faatatau ia Sooalo i ripoti a Misi. I le ripoti o le malaga lona ono i le 1846 lea na taitaia e Misi Kili (Gill) ma Misi Nisapeti (Nisbet), o tala fiafia lava i le alualu pea o le Talalelei, e ui lava e i ai nai fatiatamai na feagai ma misionare, a o Sooalo na faasaga pea i le galuega. Ua le gata i lana pupuiga o misionare, ae ua faapena foi ona ia ave le faitalia mo misionare, e filifili ai le faaogaina o fanua mo le galuega. Ma na tuumuli le Vaa Lotu, a e faaopoopo misionare e faamalosi le galuega Talai.

Na toe afea Efate i le malaga faamisionare lona valu i le tausaga 1848 ma le 1849. O le tala faanoanoa, ona ua tulaga leaga le galuega i le motu. O le toatele

o misionare mai Samoa ma le pasefika na galulue ai ua fano faatasi ma o latou aiga. Ua toatolu ua maliliu i taua faatasi ai ma nai fanau. A o isi misionare ma aiga ua po'ia i faamai.

Ia a e o loo maitauina le tuputupu pea o le galuega, ma sa tuua ai le misionare e toatasi e fesoasoani i le galuega. I ripoti faaumiumi o i le tusi a Misi Kili, o le malaga o le 1848 ma le Samoan reporter mo le malaga o le 1849, e leai se tala o faatatau ia Sooalo ma lana galuega i Efate. A o le taimi lea na iloga ai le osofaia o misionare i le maemaeā o tagata tau o le motu. Ae na toe taua Sooalo i le ripoti a Charles Hardie i le tausaga 1854, lea na ta'ua ai lo la malaga faatasi mai ma le misionare ia Setefano mo Samoa, ina ua faamatuu atu le galuega faamisionare i Efate, i le Ekalesia Periperiane toe Fuataina a Sikotilani.

E Tusa ai ma le Tala a Suli ma le Aiga o Sooalo

I le tausaga e 1995, na faamanatuina ai le 150 tausaga o le taunuu atu o le Talalelei i Efate. I lea faamoemoe, na valaaulia ai le Ekalesia Samoa, ma o lea na filifilia ai le Susuga ia Oka Fauolo ma Lotu Uele, e fai ma sui o le Ekalesia. Na auai ai foi le fetalaiga ia Sooalo Siasia ma lona afafine o Sareta, e fai ma sui o sulii o Sooalo.

Fai mai le mau a le aiga i le faamanatuina o le 150 tausaga, na fai ai se tala faakoneseti i le taunuu atu o uluai misionare. Na aofia ai foi ma le aumalaga i le faatinoina o lea tala. Sa talosaga le toeaina o Sooalo ina ia ave le faamua i le Susuga ia Oka Fauolo ma le Susuga ia Lotu Uele, ona o taitai o le Ekalesia. Ia ae e lei taliaina e le Ekalesia i Efate, ona o lo latou manatu e tatau pea ona faasolo e faapei ona i ai i le Talafaasolopito. Aua foi o Sooalo lava na taimua i le momoliina atu o alii misionare i uta i le motu, ma o ia foi na puipuia alii misionare mai le matamataita o tagata nuu o Efate. E faasa'o i molimau a le aiga le mau a Misi, o Sooalo o le toa ma le tagata tau, aua o le latou mau, o le latou tama e tino ese, maualuga ma au malosia.

Ae i ai nai vala o le molimau a Misi ma le au suesue o le Talafaasolopito, e le lagolagoina e le aiga o Sooalo. E i ai lo latou manatu na faatalaleleiina lo latou tama ia Sooalo, a o lei malaga ma tafea ai i Efate. O le latou mau, na tafea Sooalo ma lona auvaa i se taimi a ua tuanai atu le taunuu mai o le Talalelei i

Samoa (I tua mai o le 1830). O le pine o lea mea, na tafea faatasi Sooalo i Efate ma lona afafine e igoa ia Sarai, e faapei o Sarai le avā a Aperaamo o i le Tusi o Kenese. O lona afafine lea na malaga mai Sooalo mo Samoa, ae nonofo ma le alii Pomare. E oo mai le asō, o loo i ai pea tagata na tupuga mai ia Sooalo o loo aumau i Vanuatu. E aofia ai ma le alii o Korman Maxime Karlot, o le sa avea ma Palemia o Vanuatu i le 1995. Ma o loo feiloai pea le aiga o Sooalo i Samoa nei ma i latou o i Vanuatu, i tauaofiaga a le Pasefika e faia mai i Samoa nei, faapei o taaloga a le Pasefika, o faaaliga o tu ma aga ma fonotaga faavaomalo. O le taimi mulimuli na feiloai ai ma suli o Sooalo mai Vanuatu, o le fonotaga a Taitai o le Taupulega i le tausaga na sei mavae atu. O le isi pine o le igoa o le alii o Pomare. O loo taumate pea le au suesue o le Talafaasolopito pe i ai se sootaga ma Pomare o Tahiti lea na taliaina misionare i Tahiti i le 1797. A o le igoa Pomare, na faaigoa ai e Sooalo le alii o Talianaulu o Efate. O le faailoga e i ai foi sina malamalama o Sooalo i le talafaasolopito o le Ekalesia ma le latou galuega i le Vasa Pasefika.

Sooalo le Faaliliu Upu (Translator)

Na toe fa'aogaina e le Atua Sooalo i le tausaga 1855 i le galuega tele o le faaliliuina o le Tusi Paia i le gagana Samoa. o Sooalo o le tasi lea tamalii Samoa na tofia i le Komiti o le Papa o Misi. O i latou na tofia ma filifilia e toe iloiloina ma teuteu le Tusi Paia Samoa, a o lei auina atu i Peretania e lolomia ma tuufaatasi le Tusi Paia Samoa atoa. O lea galuega na maea i le 1859 ma auina atu ai i Peretania. I le tausaga 1860, na taunuu mai ai le Tusi Paia Samoa, ua tuufaatasia i le faavaa e tasi.

E tusa ai ma le mau a aiga ma suli o Sooalo Laupue Agaimalo, ina ua foi mai lo latou tamā mai Efate, na galue o ia i Vaa Lotu o le Ekalesia na folau mai Apia mo le motu o Savaii. O le faiva lea o Sooalo, o le tagata folau ma le tufuga fauvaa. O lana galuega lea na iloa ai e le Ekalesia, ma mafua ai ona filifilia i le Komiti o le Papa o Misi.

Sooalo le Faifeau Samoa

I le tausaga e 1867, na avea ai Sooalo ma faifeau o le Ekalesia i Fagamalo. O loo maua ia faamaumauga i le maa faamanatu o lea Ekalesia i Fagamalo Savaii.

O loo lomiai ai o Laupue Agaimalo, o le uluai faifeau faauuina lea o le Ekalesia mai le tausaga e 1867 i le tausaga 1884. E foliga mai i lenei faamaumauga, o Sooalo Laupue le isi uluai Samoa na faauuina ona tofi faifeau, pe a fua i ai o le uluai Fonotele o le 1875, na faauuina ai uluai Samoa e avea ma faifeau mo Sakarameta ma le Upu.

E 'au foi i ai molimau a suli o Sooalo i lea faamaumauga. O le latou mau, o Sooalo na avea ma faifeau ona sa aotauina foi i Malua. I se taimi mulimuli ane, na i ai feeseeseaiga i le va o Sooalo ma Misi o le LMS. O lea na teva ai Sooalo ma galue mo le Malo o Siamani, ma lotu ai i le Ekalesia Metotisi. Mulimuli ane ua faaoga ona tofi faifeau i le Ekalesia Metotisi, ma avea ma tausi matagaluega mo le Ekalesia Metotisi i Fasitoo Uta, ma maliiu ma lagomau ai.

Upu Faaiu.

E i ai le manatu o le a faamuta i i se taumafaiga vaivai. A e i ai le lagona, o loo i ai pea nai tafa o le soifua o lenei toa ma lenei auauina o le Talalelei, e fia faamautuina mo se isi suesuega i le lumanai. A e talosia ua faamalieina le autu o lenei suesuega. I le fia faamatieina lea o le sao o lenei failauga i le tau totoina o le fatu o le Talalelei i Samoa nei ma le Vasa Pasefika.

Saunia Dr. Arthur Wulf FS & Fraser Tauaivale FS

OSIGA FEAGAIGA **EFKS VAILOA UTA**

O le Aso Faraile 31 Oketopa na osi ai le feagaiga a le EFKS Vailoa uta ma le susuga Tavita Jr Pulu FS ma le faletua ia Naomi. O le Toeaina o le Pulega Faleata Sisifo, susuga Iosefa Afutiti FT na ta'ita'i le sauniga ma osi le feagaiga, o Faalefu Tumutalie FS (Toamua) na faitau le Tusi Paia, Tiafaafo Gatoloai FS (Tulaele) na saunia Tatalo, a o Siasia Mataia FS (Vailoa tai) na faia le Lauga. Na molimau le A'oa'o Fesoasoani, Lauano Dr. Herbert Peters i le filifiliga a le latou Ekalesia e 15 matafale, na faia i le Aso Sa 23 Aokuso 2025 i faifeau e to'a 8, ma manumalo ai le susuga Tavita ma le faletua. Na ia folafola foi o le a latou tausi lelei i le faafeagaiga ma le aiga, e pei ona sa latou faia foi i isi a latou faifeau ua malilii.

(fa'aauau itulau 13)

O LE PEROFETA MULIMULI

(O le tala faafagogo ua faaSamoaia mai le tusi, The Last Oracle, tusia e James Rollins)

Na tulaga ese le leotele o lona leo, tatagi atu i le ana. A e na te le'i iloa po o fea le tama, a e pe o loo i ai foi i luga o le nofoaafi. Na pau le isi mea e fai o le toe faasolo i tua o lana savaliga. Na ia oso ma laa agai i tua agai i le isi taavale. Na toe aapa atu lona lima taumatau, e tau autago atu i luma – ona faateia lea ona uu mai lona lima e se tasi.

Na tau'e'e Monike i lona te'i. Na fusi atu e ni tamatamailima fulufulua ona lima. Na se'i ese lona lima, a o mau pea ona tamatamailima. Na faatasi ane ma se tagitagi lemu i le uu mau.

“Marata!” Na tu Monike ma autago atu ua fusi mai i le pogisa.

O Marata na faafoi atu le fusi, ma oloolo lona alafau i le alafau o Monike, a o manava lemu atu le mapuea faafetai. Sa gatete atoa lona tino. Na lagona e Monike i lona fatafata le tata o le fatu o Marata. Na ia momotu le la fusifusiga a e na ia uu pea le lima o le tamaloa. Na faamalosi atu Marata i sana eueu malie e mulimuli atu.

Na tu i luga Monike ma na faataga ia Marata e taitai atu o ia. Na ia iloa le mea o loo ia aveina i ai o ia. Ia Piota. Na mataalia Monike a o ia taunuu atu i le taavale mulimuli. Sa le'i pei o isi taavale i le ogatotonu sa matala, a o le taavale mulimuli lea sa tapuni.

Na oso atu Marata i totonu i se faitotoa na matala.

Na oso sosoo atu ai ma Monike. Na faatelegese le manuki ma na faasino atu Monike i se tulimanu i tua. Na maua ai Piota o i luga o le fola, o faasasa'o i lona papatua.

Na autago atu le lima o Monike ma faasolosolo atu i lona tino i le pogisa. “Piota?”

Sa le'i i ai se tali mai.

Na ia lagona le manavanava o le fatafata o le tama. Na autago atu ona lima e siaki ona foliga. Pe mata o manu'a? Sa pa'u? Sa vevela pei e fiva lona tino i le pa'i atu i ai. Ona lagona lea e Monike se lima itiiti o fealua'i pei se manulele itiiti o leiloa, ua na pa'i i tamatamailima o Monike – ma na uu mau.

“Piota, faafetai i le Atua.” Na sii a'e i luga e Monike le tama ma faanofo i luga o ona vae. “O lea ua ou maua oe. Ua e saogalemu.”

Na fusi atu lima itiiti i lona ua. Na faalogoina e Monike le vevela o le tino o le tama, e ui ina sa i ai ona ofu.

Na tautala atu Piota, i lona taliga. “Alu...”

Na lagona e Monike se gatete o fealua'i i totonu o ia. O le leo e sili atu le loloto nai le leo masani o

Piota. Atonu pe ona o le pogisa, pe ona o le fefe foi o le tama. Peitai sa le'i faalogoina e Monike se gatete i ona ivi asoaso manifinifi. O le upu e tasi na fai mai, sa sili atu lona i'uleo o se faatonuga nai lo se augani. Ui i lea, e le'o se manatu leaga foi.

Na ia tu i luga ma sii a'e le tama. Sa pei e mamafa atu Piota, e ui ina ua pasi atu ma le le lava o Monike, faasolo ina vaivai ona ponaivi, ua lata ina matapogia. Na fesoasoani Marata e faasino atu le faitotoa. Na ia oso atu i fafo ma patatū i lalo. A o ia sii le tama i ona lima, na faatopetope atu Monike i tua agai i le pito i luma o le nofoaafi. Sa ia aumaia le fana e tasi, a o le isi fana sa ia tuua i le taavale pito i luma.

O lona taunuu atu i le taavale, na fesili ai Monike, “E mafai ona e – ?”

E le'i uma atu lana fesili, a ua oso ese Piota mai ona lima ma tu i ona lava vae.

“Nofo atu iinei.” Na vave ona a'e i luga Monike, tago atu i le fana lona lua, ma amo i lona tau'au.

Na ia toe foi atu ia Piota. Na tago atu le tama u'u lona lima.

Na to le manava a Monike. O fea le itu? O le nofoaafi na tu i le afa o le ana. E mafai ona la toe foi ia Konesetatinu ma isi tamaiti pe fa'auau pea i luma. Peitai afai e i ai so latou faamoemoe e taofi lenei fafine ulu leaga, na iloa e Monike e le tataua ona toe foi i tua.

Atonu sa faapea foi le manatu o Piota. Na alu atu ai foi ma le tama i le itu lena. Agai i Keleniapisiniki 88. O ana fana e lua o saisai i lona tua, o le tama ma le manuki o mulimuli atu, na savali atu ai Monike i le ana pogisa uliuli. Ua latou taunuu sa faataamilo atoa ma ua agai mai i le aiga. A o le a le ituaiga faafeiloai o le a latou fetaui?

Na lūlū le ulu o le foma'i. “E faamalie atu, lau afioga i le Taitai Aoao. Ou te le iloa pe se a le mea o tupu i tamaiti. E le'i tupu muamua se ituaiga faaletonu faapenei.”

Na faatau pupula atu Savina i le potu. O ni tamaitai tausisi ma'i se toalua ma ni fitafita e toalua na fesoasoani e faataatitia tamaiti, e laina i luga o le fola e pei o ni laau ua tatuu i lalo. Na latou aumai ni aluna ma palanikeke mai isi potumoe. E toalua ni fomai faapitoa na valaau: Dr. Peterova o le fomai tau neura, ma Dr. Rosatoropovika o le fomai inisinia tau tino.

I lona peleue ie mamoe, na tula'i ai Peterova ma ona lima i ona puimanava. O le vaega faafomai sa tapena e tuua le nofoaga ina ua valaau atu e o mai iinei. O se solo tele o veni ma loli ua uma ona la'uina latou uta ma ua sauni e tuua le nofoaga.

"Ou te manaomia se lipoti manino atoa ina ia ou malamalama lelei i le mea o loo tupu," na ia fai atu ai. "Ma o lea ua uma ona matou tala'ia –"

"Ioe. Ua ou iloa. O le a faatali seia taunuu i le ofisa i Mosokou. E mafai ona ave tamaiti ma le saogalemu?"

"Ia, o lo'u talitonuga lena e mafai."

Na pulato'a Savina i le fomai. Na te le'i fiafia i lana tali faauigalua.

Na lue atu le ulu o le fomai e saga faamautu. "O loo latou toafilemu. E mafai ona matou aveina i latou."

"Ia fai loa tapenaga."

"Ua lelei, lau afioga le Taitai Aoa."

Na faataatia atu e Savina isi faamatalaga auiliili i le aufaigaluega fomai ae toe agai ifo o ia i lalo i le potu faatonutonu i lalo. A o fesagai o ia ma le mataupu iinei, sa fai foi ana fesootaiga ma ana punaoa i le vaega faamiliteri a Rusia. O le pisi fenunia'i o faamatalaga i Kerenopili e foliga mai ua amata ona matalatala. O ripoti feteena'i ma faamatalaga salalau solo na feavea'i i mea na tutupu i le sauniga aloaia: o ituaiga tala eseese, mai se matuai salalautasi o polokalame faaniukilia, i se osofaiga faatupu faalavelave a tagata leaga mai Keken. O se faamaoniga autasi e faapea e mautinoa sa i ai se mama faakasa oona, e ui ina sa le'i manino le tele o lenei liki.

Ae aisea ua ffilemu ai Nikolasi?

O le popolega na ia atiati lemu i le pito o lona ita ma le onosai.

A o lenei foi ua tula'i mai le tulaga uiga ese i tamaiti. Na manaomia e Savina le taatia ese o le manatu i isi faafitauli lavelave, a e ia silasila toto'a i le mataupu o loo i ona lima i le taimi nei. Po o le a lava le tulaga o i ai i Kerenopili, a o le a fa'aalu pea le Gaioiga Saturina. E tusa foi pe afai ua toilalo Nikolasi, a o ia e lē solomuli. O lana gaioiga toatasi o le a faavevesi ma faafenuniai le tamaoaiga o le lalolagi, fasioti le faitau miliona, ma faasalalau le kasa oona taamilo i le lalolagi atoa. O le a sili ona faigata, peitai o le i ai o tamaiti savana atamamai faapitoa i la latou vaiga, o le a latou manumalo ai.

O le i ai o lenei naunautaiga i lona mafaufau, na ia tuu ese ai le fenuniai, ae saili mo le faatinoga o le faamoemoe. Na ia iloa le mea o le a ia faia.

O lona taunuu atu i le fale lafitaga, na tau atu Savina o loo pepē pea tv i le puipui, vagana le ata o le MC 337. Na ia iloilo lelei le salalau ai o tama'i tino i le fola ma'a. Sa leai se minoi mai i lena itu.

Na ia faliu atu i inisinia e toalua. "Aisea ua lē ola ai isi meapueata i le initaneti?"

Na tu i luga le inisinia sinia. "Na mae'a le toe tapēina o masini i nai minute talu ai. Sa matou faatali atu mo sau faatonuga ina ia toe faaola ai."

Na mapuea Savina ma oomi ona tamatamailima i lona muāulu. O le mea ea e seiloga e ta'ita'i nei tagata i o latou isu? Na ia geno atu i le laupapa o i ai ki o masini. "Ia fetagofi e fai."

E ui i sona mana'o e otegia le tamaloa, a e na ia taofiofi i lalo lona leo. Na ia faatonuina le tapē o masini ma molī, e le'i i ai se isi upu faasino i le faatulagaina o le paoa.

Ina ia lavea'iina ai nisi lē femalamalama'iga, na faasino atu ai Savina i le ata o le MC 337. "Ia tape ai pea le paoa i isi fale faatonu laiti. I mea uma vagana lana meapueata." Na te le'i mana'o i nisi mea faate'ite'i mai lena itu.

A o faasaga atu inisinia i la la'ua galuega, na emoemo mai moli i luga o laupapa, faapea tv pogisa na faatumulia i ata o le ana ma le ogatonu o le gaioiga. Na foliga lelei mea uma – se'i vagana lava si mea e tasi sa matilatila.

O le nofoaafi ua lē o toe paka i autafa o le nofoaga o le maina.

Na faasino atu le lima o Savina i tv. "Aumai i luga ata, faasolo mai lalo o le ana. Su'e le nofoaafi."

Na oomi solo e tamatamailima ki o le faatonutonu autu, ma faailoa solo ai i luga ata o le ana, na niniva solo ai lona ulu. Ona i'u lea ina iloa atu le ata o le nofoaafi. Sa nofonofo malolo i luga o le auala. Na laa atu Savina faalatalata atili i le tv ma iloilo lelei i taavale o 'oa ma uta. Na te le'i iloa atu ni gaioiga. O loo i ai se isi o lafi, peitai sa le'i manatu ai Savina.

"Faasolo atu i lalo o le ana," na ia faatonu atu ai.

Na iloa atu nisi ata o faasolosolo mai i luga. Ona iloa atu lea o se gaioiga i le tasi ata.

"Taofi!"

Na malamalama le pito lenei o le ana i se matauila e tasi. Sa faataatia pe tusa ma se kuata o kiliki mai le faitotoa palasa. A o vaavaai atu Savina, na iloa atu ni tagata o ulufafo mai le pogisa, ma savavali mai i le malamalama mai totonu o le ana.

Na mau le uu o tamatamailima o Savina i pito o le laupapa faatonutonu.

O le Amerika...sa ta'ita'i atu le lima o se tamaitiiti.

A o la'ua aliali atili mai i le malamalama, na iloa lelei atu e Savina le tamaitiiti.

O Piota.

Na tu sa' o i luga Savina, ona autilo atu lea i le ata i luga o le MC 337. O tamaiti uma sa taatitia matapogia. A e aiseā na tu ai pea lenei tamaitiiti ma fealua'i solo?

“Lau afioga le Taitai Aoa?” na fesili ai le inisinia.

Na taavilivili le mafaufau o Savina a e na te le'i maua se faamatalaga. Na lūlū lona ulu. E peiseai na la'ua mateia o loo pupula atu mata ia i laua, na tutu ai le toalua i le malamalama. Na tilotilo atu le Amerika i ona tua. Na faapuiti ona mata i le faaletonu.

A o toe foi atu le paoa ma toe mumū mai moli, na iloa e Monike o lona uiga o loo ola foi meapueata i le initaneti. Sa le'i iloa tele se mafuaaga poo se malosi e lafi ai, ona savali pea lea o Monike, agai atu i le matauila lata mai. O le taimi lena na ia iloa ai o loo i ai se mea o sesē.

Poo se mea o loo misi, ua leai.

Na ia su'e atu i ona tua. Ua leai Marata. Sa ia manatu o loo mulimuli mai ia te ia i le pogisa. Sa fealua'i filemu lava. Na ia toe autilo atu i tua i le fa'a'i o le ana. E leai se isi na iloa atu. Pe mata sa faatali pea i tua i le nofoaafi? Na toe autilo atu i luma, manatu ai na muamua atu ia i laua. Peitai na gata mai le ana i le lua selau futu i le mea sa i ai faitotoa palasi uumi.

Sa le'i maua Marata i soo se mea.

Na te'i i le pasae mai o sipika mai faitotoa, ma se leo maati na tautala mai faaPeretania. “O mai pea i luma! Aumai le tama i le faitotoa pe a e fia ola pea.” Na tu Monike ua pei ua malo i le aisa, ua na le iloa le mea e alu i ai mai iinei.

12.35 afiafi

Kisetima, Rusia

Na nofo Karai i totonu o se loli faifaatoaga tuai, ma na ia taitai atu le solo a taavale i le faitotoa o le malae vaalele ma ui atu ai i fafo i le auala e itu lua ona ituala ma o atu i fafo i le atumauga. Na faaituala lua ai pa o laau kerisimasi ma fuagalaau o laau kone, na fausia ai se vaaiga lanu meamata matagofie.

I le faata na iloa atu atu e Karai i tua, le mou malie atu o le aai itiiti o Kisetima ma leiloa atu i le mafiafia o le togavao ma laufanua. O le aai sa tu i auvaemauga i sasa'e o le atumauga o Urale, na o le iva maila mai lo latou faamoemoega, o Keleniapinisiki 88. E pei o isi vaega uma o le laufanau, o le aai na le'i aunoa foi ona i ai ona talaaga o faaletonu faaniukilia ma

faatafunaga. Sa taatia faatifatifa ese mai le isi nofoaga faaniukilia, na faaigoa o Kelenisapinisiki 40, sa faaigoa foi o le Maiaku, o le upu Rusia o lona uiga o le “faailoilo”. Peitai o Maiaku sa lē o se faailoilo susulu mo le saogalemu faaniukilia o Rusia. I le 1957, na pasae ai se loli uta o otaota niukilia talu ai le faalētonu o ea malulu, ma salalau ai le valu sefulu o tane kasa niukilia i le nofoaga, ma aveeseina ai le faitau selau o afe o tagata. Sa natia faalilo e Rusia lenei faalavelave seia aulia le 1980. Ina ua tau atu le loli i se pioga ma mimilo ai, na lilo atu ai le aai, e pei ona lilo o le tala faasolopito faaniukilia o Rusia.

Na fa'aauau pea i luma, a o faamautu Karai i lona nofoa. Na kolosi atu le auala i se ala laupapa o ona pa pipi'i sa vali mūmū o taavale fuimū. O se lapataiga. O le auala laupapa na fausia i luga o se vaitafe loloto sa faailoga ai le tuaoi muamua o fanua faasaina. Sa taamilo atu le auala agai i luga ma totonu o le atumauga.

O tua ifo o Karai sa mulimuli atu ai le solo a taseni loli e eseese ituaiga ma fausaga, a e sa malepelepe uma ma palapala. O Karai sa ia faasoa faatasi le nofoa pito i luma ma Luka faatasi ma le avetaavale, na latou talanoa faa Romani. Na tusi atu i luma Luka ma lue mai ai le avetaavale.

“E le o toe mamao,” na fai atu ai Luka a o ia liliu ane i ai. “Ua uma ona latou auina mai tagata vaai e vaaia le auala ma le ulufale atu. Latou te lipotia le tele o taualumaga. E tele taavale ma loli o loo aga'i ifo i lalo o atu mauga.”

Na foliga ita Karai i le tala. E pei o se tuufaagaogaoina. Pe mata ua latou tuai?

I le pusa o le loli, na feosofi mai ai ni tamaloloa e toafa, e pulupulu faa'afa i palanikeke. Na maitauina e Karai la latou uta o auupega sa natia i lalo o palanikete: o pusa o fana uumi, o tamai fana, e oo lava i fana pomu.

Sa faamatala e Luka le vaivai o le vaaiga o nei ituaiga auupega i le maketi uliuli a Rusia. O le tama'i vaegaau, na faamaopoopo mai ituaiga o Kipisi Rusia, na latou feiloai i Kisetima. Na latou sili atu i faailoga o tamaloloa na aumai e Luka mai le Ukureni. Na tauaao atu e Karai ia Luka Heni: afai e te mana'o e faamaopoopo vave se vaegaau faamiliteli, o le Kipisi lea e valaau.

O latou tua ifo, o mulimuli atu ai Koualasaki ma Rosauro. Na latou tuua Elisapeta i tua i le vaalele, ia saogalemu, o leoleoina e ni fitafita Peretania se toatolu.

E tatau ona vave le gaioi a tagata uma. E tāua le vave. O le fuafuaga ia osofai le nofoaga i lalo o le eleele, ia loka, ma taofi soo se gaiioiga sa fuafuaina. O le a lava le natura o le Fuafuaga Saturina o loo tumau o se misiterio. Peitai, ona o loo taatia i le ogatotonugalemu o le nofoaga muamua o maina sa gaosiga ai pulutoni ma iurineina, o lea e mautinoa ai o se fuafuaga fesootai ma kasa malolosi leitio faaniukilia.

Sa lagona pea lona fefe i upu a Senatoa Nikolao Solokova.

E faitau miliona o le a maliliu pea.

Sa malamalama Karai o le tamaloa sa fanau tusa ma le ivasefulu maila le mamao mai iinei, i le aai o Iekaterinipeka. O le vaega lenei sa fai mona sui le tamaloa lea, i le Faalapotopotoga o Faigamalo Rusia, o lona uiga sa ia iloa lelei le nofoaga ma ona mea lilo. Afai e i ai se tasi na te fia faia se faufauga mo se faalavelave faaniukilia, o iinei le nofoaga lelei ma talafeagai e fai ai.

A e o le a tonu le fuafuaga?

I tua i Kisetima, na savalivali solo ai Elisapeta i le umi o le vaalele. Na piilima i luma o lona fatafata, o lona auvae o loo maulalo a o ia tau mafau fau loloto. Sa ia popole i isi o le latou vaega, na fefe ina ua faalogo atu, i le mea o loo taumafai Karai ma isi e taofi.

E faitau miliona o le a maliliu.

Se fasioti tagata ina a mata'utia.

O lona atuatuvaale na tu ai pea o ia i ona vae, mo le vaega, mo le ola o le faitau miliona. Sa i ai lana komepiuta feavea'i sa matala i luga o le laulau. Na ia taumafai e fai ni galuega, ia gaioi ma pisi ai. Na ia taumafai e tuu i luga ana ata sa pu'e. O Porofesa Matesone na teuina lana meapueata ina ua ave faamalosi o ia e le au Rusia. Na toe faafoi atu ina ua latou toe sosola ese mai le falepuipui i Piripiatu.

I luga o le tv, na faasolosolo a'e ai ata na tapu'e.

A o ia savalivali solo, na ia vaaia ai le omofalosi, o loo taatia i le ogatotonu o le uili sakara. E ui i ona popolega, a o lona fatu sa fiefia i le manatu atu o lena maa o le Telefai mao'i. Mo le lua sefulu tausaga, sa iloa e le au su'esu'e o talafaasolopito, o le maa itiiti sa i le fale mataaga, o se maa kopi, a o le maa mao'i moni ua leiloa. O nisi a'oa'o sa fatu ni tala 'ole, faapea e i ai se vaega o tapuaiga na latou sao mai le faaleagaina o le malumalu, ma o i latou na sa gaoia le maa mo la latou malumalu natia.

Na toe faasaga ane Elisapeta i le komepiuta feavea'i. Na ia faatau pupula i le omofalosi. O le faamaoniga

lenei. Na ia nofo ifo faamagoto i se nofoa, ina ua taia faafuase'i o ia i se mafauauga. Na ia manatua le mea na vane i totonu o le kopi sa i le fale mataaga: o se solo na tusia faaofuofu i le gagana Sanisakarite.

O se tatalo o aso anamua ia Sarasavati, le atua Initiu tamaitai o le atamai ma le poto i mea lilo. E le iloa poo ai na ia tusia iina pe aisea foi. Peitai e le se mea fou le vaaia o ni tusitusiga faalelotu mai se tasi o lotu agai i se isi tapuaiga.

Ui i lea, na amata ona masalosalo Elisapeta i le mea moni. Atonu sa tuu ai iinei le kopi o le omofalosi e ave ma faasino ala. Na ia faasolosolo i ata eseese ma tau atu ai i le ata o le moseki i le puipui, o i ai le ata o se tamaitiiti ma se fafine talavou o loo lalafi mai se fitafita Roma, i lalo o le faapaologa o le omofalosi, i le mea na tusia ai le solo Sanisakerite. O lona faitau, "O ia e leai se amataga, se faaiuga, poo se gataaga, ia puipuia o ia e le Atua Tamaitai o Sarasavati." E le iloa pe faasino tonu i le Perofeta mulimuli, o se tatalo ina ia puipuia lona laina tuufaasolo. Mulimuli lava, o le atua fafine o Sarasavati ma ia faia lona aiga i totonu o se vaitafe paia. O le toatele o a'oa'o su'esu'e i lotu e talitonu o lenei vaitafe faamisiterio, o le Vaitafe Initusi, lea sa fausia ai e tagata Eleni na faatafea o latou aiga fou.

Na masalosalo Elisapeta e i ai se tasi na ia tuu le feau faalilolilo mo isi ina ia mulimuli ai. E pei ona sa la'ua faia, o ia ma lona tamā.

Na ia toe aumaia i luga le ata o le omofalosi mao'i. Na ia pu'ea ni ata se tele, aofia ai le solo o laina e tolu na vane i luga o le maa sa lapata'i mai ai i le mailei – na tusia i le faa Harapana, faa Sanesekarite, ma le faa Eleni. Na ia toe tuu i luga le ata lena.

Sa i ai foi se isi faataitaiga o lenei solo e tolu laina i luga o puipui o le ana. I lalo ifo o le ata o le tama mata mu mu. Na ia tuu a'e foi i luga ma lena. O lalo ifo o le moseki, o le laina solo faa Harapana na maopoopo lelei, a o le 'afa o le faa Sanesakerite ma le faa Eleni na masae ese. Na o se mataitusi e tasi pe lua sa mafai ona faitau.

Na ia faitaua se upu na ia mafai, "O le a mu le lalolagi..."

Sa motu le laina o le solo, faamanatu mai ai ia te ia le mea o loo saili Karai ma isi e lavea'i 'aia le tupu. Na ia faatau pupula i le ata o le tama o loo ea a'e i le asu ma le afi mai le omofalosi, ma na lagonaina ai le gatete o lona aafiaga. A e o le a le atoatoa o le feau? Na pau le laina solo sa atoa o lea na tusia i le gagana Arapana. O se paso upu sa fai ma lu'i malosi.

(e faia pea...)

LE POLOKETI ONESEMO

O le polokalame lenei a le Fono Galuega Faamisionare o le Lalolagi (FGFL/CWM), ua ta'ua o le Poloketi Onesemo (***The Onesimus Project, TOP***), ua lautogia uma ai sui Ekalesia o le FGFL, e i ai le EFKS. O le poloketi e tauia, ma amanaia ai le sao o tagata sa fai ma pologa, e faigaluega ma atina'e le Ekalesia i lona amataga mai. O lona faatinoga, e maua mai fesoasoani/meaalofa tau tupe mai le FGFL, e faitalia le Ekalesia ma le auala, e faailogaina ai le amanaia o i latou uma nei sa pologa pei o Onesemo. Mo le EFKS, ua lafo atu lenei poloketi i le susuga i le Porofesa Pule ma le Kolisi i Malua latou te faatinoina. Ma o le uluai sauniga lotu sa tatala aloaia ai lenei poloketi, na faia i le laumua o le Ekalesia. Na ta'ita'iina e le susuga i le Pule o le Kolisi. A o le sauniga lona lua sa faia i le Maota o Tupulaga i Mulinu, na ta'ita'iina e le susuga Taitaifono Komiti o Malua, susuga Asotasi Gu Time FT. O le sauniga na faatumulia i tama ma tina matutua, o matua ma fanau o aiga uma o i latou e tupuga mai i augatupulaga sa galulue faapologa i Solomona ma isi nofoaga o faatoaga ma lafumanu a le Ekalesia, i latou ua faalupe O Tama Uli. O le saunoaga autu o lea sauniga na saunoa ai le afioga Taitaifono Fono Tele, susuga Enefatu Lesa FT. O lana saunoaga lenei:

Faafetai i Lau Afioga i le Taitaifono o le Komiti a Tama o le Ekalesia, mo le feau faamafanafana o le Talalelei, ua tomatauina ai lenei mamalu tele ma le faamoemoe o lenei aso.

O Samoa ua potopoto o loo ta'ui e sa ma mamalu, o le a nu'unu'u atu ia faatini o tausala. A o Samoa ua uma ona tofi, e leai se isi e toe autalaina ua taoto a o se ala ua oo. A o le aso lenei ua faia e le Alii ina ia tatou olioli ma fiasia i ai. Le Atua e, ua fai lava Oe ma mea matou te nonofo ai i lea tupulaga ma lea tupulaga.

Ae o le a faapito augafa se tala o lenei taeao i le faamoemoe ua afua ai ona tatou feiloai. Faafeiloai atu i le paia tele o le mamalu ua valaauina mo lenei faamoemoe. O upu a le atunuu ua tini pa'o le uto e pei o le faiva i vai, ua tau ai o Alae, e pei o upu i le ulu tautogia, i Aleipata. Faafetai ua tatou feiloai ma lo outou paia ma le mamalu e pei ona faatalauala atu le Afioga i le Alii Polofesa o le Pule o le Kolisi

Faafaifeau, o sui lava ia o le Ekalesia, o e ua fitoitonu i ai lenei faamoemoe. Se taimi saunoa le Failautusi Aoao o le Ekalesia e faamatala le mafuaaga o le iuga o le Fono Galuega Faamisionare i le Lalolagi, ua afua ai le faitauga o le aso.

O le tala i le fanua o le Ekalesia i Solomona ma le fesootaiga ma lo outou paia, o se isi o vaega o le tala faasolopito o le Ekalesia, pe a oo ina faamatala lona tala. Ona o tua atu o le igoa Solomona o lo o taoto ai nisi o tala o le faasologa Ekalesia Faapotopotoga Kerisiano Samoa. Peitai o se vaega nunumi, tau le iloa, tau le lagona o le tala faasolopito, ona e ititi faamaumauga e ui i nai tala tuu taliga. A o le igoa o lo o faaigoa ai le fanua o le Ekalesia e i gauta o le ala faalava i Aleisa, e i ai lona tala, e i ai le faapogai, ma o se isi o mea taua e manaomia ona iloa e tupulaga o le Ekalesia i ona po nei. Auā o le tali o le igoa o le fanua lea sa nonofo ai tagata mai Solomona. Ua igoa ai le eleele lea, e oo mai i le taimi nei, seia oo i aso e uma ai le lalolagi a le Atua.

Ma o le tala o le oo atu o i latou i lea fanua o le Ekalesia, o le tala o lo latou nonofo ai, e fia ni tausaga sa alala ma papa aao ai le mamalu tele o outou matua ma tua'ā, i lenei fanua, aiseā na o ese ai, na faapefea ona o ese, o le a se tala a le Ekalesia i lenei taimi. O le mea lenei o loo fia malamalama tele i ai le Ekalesia i le taimi lenei. Atonu e mafai ona maua se tala sili ona lelei lava, i tusiga a le fanau ma suesuega o lo o agai tonu i lenei mataupu. A o le a le tala a le Ekalesia i lenei taimi ma lenei augatupulaga. Fia manino fia iloa, fia maua le tala moni ma le sa'o o mea na tutupu, na afua ai Solomona ma faaigoa ai le fanua o le Ekalesia e oo mai i le taimi nei.

O le asiasiga a le Komiti o Tupe a o fai a'u ma failautusi o le Komiti i lea taimi 2012 -2013, sa matou asia ai lenei fanua, mo le taimi muamua lava mo au. O le ala i lea taimi faataamilo i le fanua, o loo iloa ai ona tuaoi o loo siomia i le pa maa. E lei soo i lea taimi le ala na sua. Ae ina ua tulai mai e fai ma taitaifono, ma iloa ai i le asiasiga a le Komiti o Atinae, ua soo le auala, faatasi ma le iloa e soo atoa le fanua lenei e 500 eka i le pa maa. O le ala e mafai ona fai ma

molimau faamaoni mo e sa nonofo i lenei nofoaga, ua faigofie ona su'e tuaoi ma fai le auala ona o le pa maa lea, sa ati e outou tuua. Ma nisi lava o mea taua e fesootai ma e na nonofo i lenei nofoaga.

A o le agaga o le faafetai e fia faaleo, e fai ma sui o le Ekalesia Faapotopotoga Kerisiano i Samoa, Samoa nei ma atunuu e mamao. Mo outou uma ua mafai ona outou tala aao mai, o e na tupuga mai i sulugatiti o matua sa nonofo i lea nofoaga, faafetai, faafetai tele lava. Aua o le sao o outou matua sa faatinoina ai le faatumauina o le fanua ma faaigoia ia Solomona, e tautala mai pea mo le Ekalesia Faapotopotoga Kerisiano Samoa, e oo mai i le taimi nei ma aso o i luma. O le Agaga faafetai lea o le Ekalesia e ui ina le 'au'au i sa matou upu, e faamālūina ai lo outou finagalo. A o le Atua na te faia le mea sili ona lelei, mo e sa pa'u lo latou afu i le atinaega o le Ekalesia, i soo se mea o lo o outou alaala ai.

Talofa e, i le afu toto, le afu maligi, le tiga ma le fatuatia, o nai outou matua, ua le maua avanoa e faafofoga ai i se tala a le Ekalesia, ma le oo mai i nei taimi, ona o la latou maa na togi ma le 'aso na velo, aua le Ekalesia Samoa, ma manatu o loo faafofoga mai le mavana o le eleele a o faaleo le agaga o le loto faafetai o le Ekalesia. Mo outou ua oo mai ma nisi e lei maua lenei tala, a o outou matua sa pa'ū lo latou afu i lea eleele, faafetai o la outou pule lea, ua malie o ua malie malo, ua faasao.

Ui i lea e le mafai ona faamaopopo mai le ipuvai ua masaa, aua ua moni upu a le Failauga o loo faamauina i le 4: 1 – 2, “Ona ou toe mafaufau lea i sauaga uma o faia i lalo o le la, faauta foi i loimata o e ua sauaina, ua leai foi se na te faamafanafanaina i latou, ua lima malosi foi e na sauia ia te i latou, ua leai se na te faamafanafanaina i latou”. Ua iloa le lima na sauia, ua tupu ai le fememeai, mafatia, faatoilaloina ma faamatagaina, ua le mafai ai ona maua le faamafanafanaina mo na fatia ua sola.

Ae muamua ona matou asu vai malu i lo outou mamalu, auā o le agaleaga o le Ekalesia i le taimi ua sola, o le agasala lava lea o le Ekalesia e oo

mai i le asō. E manaomia ona fofō ma faamagalo e le Atua, le Ekalesia Faapotopotoga Kerisiano Samoa, Samoa nei ma atunuu e mamao. E amata i ona faauluuluga, Laulau a le Fono Tele, faifeau toeaina, o ona faifeau, o ona a'oa'o, o ona tiakono, o faletua o ona tamā ma tina matutua, o ona tupulaga talavou, e oo ia matou fanau, o taimi ua sola faapea le saofaiga o le taimi nei. Faamolemole, faamagalo mai i matou. O lo outou finagalo faale Atua e natia ai se leaga o le Ekalesia Faapotopotoga Kerisiano i Samoa, a o le tatalo mo lenei taimi, Ia Mesepe lenei, tou te le sopoia e fai se leaga mo i matou, e faapea foi le Ekalesia ona le toe sopo atu, a ia faamagalo mai le Alii mo i matou.

A o le a tatou talia pea lupe o maūnu, ma le faamoemoe i le agalelei o le Atua i se atoaga o le tala ma suesuega faapea foi nisi o molimau ola o lenei aso, e matimati ai le sa o le Ekalesia i le humanai, ina ia fai le agalelelelele ma le alofa.

Faamanuia mai le Atua i lenei aso, saunia faale agaga tatou mo le Aso Sa taeao. Faamanuia lenei potopotoga ona o Iesu Keriso. Faafetai tele.

(Saunoaga susuga Enefatu Lesa FT),
(Taitaifono Fono Tele).

OSIGA FEAGAIGA VAILOA UTA

Na molimau foi le susuga Tavita e tusa o lo la'ua talia ma le loto faafetai, o le oo atu o le valaau a le Ekalesia. Na ia faafetaia matua faaleagaga ma Ekalesia i Falevao, Saleapaga ma Lotofaga, o la'ua matua ma aiga, o uo ma paaga i le Tala Lelei mo le tapuaiga ua tali le Atua e ala i le valaau. Na ia tautino foi lo la'ua ausage faaleagaga, e manaomia ai le lagolago a le Aulotu latou te galulue faatasi e manuia ai le galuega a le Atua. O Tavita na i'u mai Malua i le tausaga 2019, ona galue lea i le Matagaluega A'oa'oga Kerisiano, o le faletua sa faiaoga i le Kolisi Leulumoega fou, ma la'ua galulue lagolago i le Toeaina ia Tafa'i Galumalemana i le EFKS Falevao ma le Pulega Anoamaa.

O le sauniga na faatumulia i le paia o aiga na lua, faapea le paia o le Ekalesia i Vailoa uta ma le Pulega Faleata Sisifo tainane le Matagaluega Faleata. O le Taitaifono Komiti Au Toeaina, le Faatonu o le Matagaluega Apia Sasa'e, Asotasi Gu Time FT...

(faauma itulau 15)

O AU AFIOGA O LE SULU I O'U VAE

UA E MANU'A I TOTONU O LAU LOTU?

“¹⁸Ou te ati a'e foi la'u Ekalesia...” Mata. 16.

E i ai taimi e faamanu'alia ai i tatou e isi uso kerisiano, i totonu o a tatou lava aulotu ma ekalesia, ma o isi ia taimi tatou te lagona tele ai le faanoanoa; peitai o le ekalesia e faatumulia i tagata lē atoatoa, tagata latou te faia mea e lē tatau ona faia. Fai mai se tasi faifeau, 'O le Atua e galue ia i tatou i le tele o auala... o se tasi o nei auala sili, e galue o Ia ia i tatou e ala mai isi tagata.' O le mea lea, ae e te le'i siilima ma savali ese, o nai motugaafa nei e manatunatu i ai:

(1) Ia tautino le tetele o le ogaoga o ou tiga, ma amata taumafai e onosa'i ma tauivi ai. Ma e te le mafai ona faia lea mea i lou sola ese. Ia lagona le faamaulalo e fesootai ai i lē ua na faatiga ia te oe, ma lou loto ua naunau e faalelei ma ia. Ia talanoa i lou manu'a a ua i ai le faamoemoe e faate'a ese ai le tiga, a e aga'i i luma.

(2) Ia fesili ifo ia te oe, 'O le a la'u taofi i lenei mea?' Pe afai e leai sou aafiaga, e pei o se mataupu i se taitai faatuatuaina ua lē faamaoni ma pa'ū ai faaleagaga pe faasolitulafono, ona e fesili ifo lea, po ua e tuu lou faatuatuaga faaletagata i o latou uiga tagata. Sa e manatu o ni tagata e atoatoa i latou? O lenei la ua e iloa e leai, e mafai ona e faamagaloina i latou?

(3) Fesili i le Atua pe se a le isi mea e fai. Na te silafia lelei mafauauga ma manatunatuga i loto o tagata o loo aafia. Ia tuu ia te Ia se taimi e tali mai ai.

(4) *“²³Ia sili ona leoleoina o lou loto i le leoleoina o mea uma; auā e tupu mai ai le amio.” Faa. 4* Ia e filifili e mulimuli ma usitai i le Atua, tusa lava poo taimi ua nuti lou fatu ma tiga faamanu'alia lou loto. Na o Ia na te mafai ona saili ma silafia mafuaaga ma faamoemoega, ma o Ia foi e amiotonu ma agalelei. Peitai o le tele o taimi, o lo tatou faatuatua e tatau ona sau muamua a e le'i fetafea'i ana faamanuiaga.

(5) Pe afai lava ua lē ma'alofia lou tu'ua o le ekalesia a e alu ese, ia e tauto ia te oe ma le Atua o le a e tu'ua faalelei. Ia 'aue e te faia se upu vale poo se tala e leaga. 'Aua e te tu'ua le ekalesia ma le loto ita, ma ia tautino le mea lelei, tusa pe se mea itiiti. E sili ona taua, 'aue e te siilima. E lelei le Atua, e lelei lana Ekalesia, a o tagata e i ai sesē. Saili se isi ekalesia e te tapuai ai, ma le malie o lou loto; ma ia faamaoni i ai ma lou loto atoa.

“Ou te ati a'e foi la'u Ekalesia...” (2)

Ina ua folafola mai e Iesu le faavaeina o lana Ekalesia, na te le'i saunoa faasino na o laupapa ma piliki ma mea faufale e fausia ai falesa ma maota; a e na Ia saunoa i le fausia o lana ekalesia o tagata lautele, tagata e lē atoatoa, tagata agasala e ulufale mai i le faitoto'a o malumalu ma aumai o latou faafitauli. O le mea lea na malii ai Keriso... na Ia malii mo ona tagata – lana ekalesia... o le faapotopotoga o tagata, e ta'ita'i e tagata, ma e leai se tasi o tatou e atoatoa. O i tatou o se vaega gaugau, talosia ma faamoemoe e iloa ma ta'utino lo tatou ausage, ma talitonu na o Iesu e toatasi na te faalelei, faaola ma faamagalalo.

O le a le umi tatou te i ai i totonu o le ekalesia, e lē mafai ona tatou ausia le atoatoa... e tatau ona tatou galulue i ai i aso taitasi ma aso uma. Tatou te fesaga'i ma o tatou uiga natura faaletagata i taeao uma pe a alafa'i mai, ma afai e tupu lea mea, o le a tatou taia le tasi i le isi, ma o le a tatou lavevea, manu'anu'a ma tigaina. O lo tatou mana'oga masani ia faamamao ese ma mea latou te faamanu'alia i tatou...

O le mea lea, pe afai tatou te faalogoina upu taufaifai ma tagata o muimuia i tatou, tagata faafoliga faafaresaio, e ataata mai a e solomua le taufaaleaga mai, e tasi le mea e faamuamua i ai lo tatou manatu, o le tuua loa o le ekalesia ae savali ese. Peitai, pe afai tatou te faia lea mea, o le a tatou faamamao ma faaeese i tatou mai le ekalesia - le mea na faia e le Atua mo i tatou ia fa'aaoga mo lo tatou manuia. E leai se mau a le Tusi Paia faapea, e leai nisi latou te faamanu'alia i tatou. A e o loo a'oa'oina mai i tatou, e lē fesoasoani pe afai na o le tatou nofonofo ai pea ma le tiga ma lagona faanoanoa mo i tatou; leai, a ia tu i luga ma amatamea. Mataio 5, *“²⁴alu oe ia muai faalelei i lou uso, i le e sau ai, ma avatu lau taulaga.”*

O loo lapatai mai le Afioga Paia a le Atua, ina ia 'aue le tuua le mea oona ia mautu ai i totonu o tatou. Eperu 12, *“¹⁵Ia outou faaeteete ia te outou, ne'i i ai se tasi e le maua atu le alofa tunoa o le Atua; ne'i ai se aa oona e tupu ae e faasoese ia te outou, ma leaga ai nisi e toatele.”* Aua le faataga faafoliga e leai se mea na tupu, ae ia faamaoni e faafesaga'i ma mea ua tutupu; ia ta'utino pe afai e manu'a ma malepelepe le agaga, ma lafoai atu i aao o le Atua na te faia le tau ma sui, i lana faamasinoga poto ma amiotonu.

(F. Tolua)

O E UA MALILIU

LEOTA PHILIP WILSON
14.03.1970 – 19.09.2025

O Leota Philip Wilson o le Tiakono a la matou Ekalesia EFKS Sydney. Na soifua mai o ia i le Aso Toonai, 14 Mati 1970, a ua valaauina e lona Matai i le Aso Faraile, 19 Setema 2025. Ua atoa ai le 55 tausaga, 6 masina ma le 5 aso o lona soifua. E tupuga mai i se aiga sa i ai i le tau amatamataina o le EFKS i Sini ma Ausetalia nei. O ona matua sa avea ma Tiakono Toeaina muamua a o tasi le Matagaluega a Ausetalia. Na faaipoipo atu o ia ia Faaititi Toafa Fuataga i le tausaga e 1996. Ma e toafa nai o la alo (3 teine, 1 tama). A o le tausaga e 2016 na faauuina ai i lo la tofi Tiakono. O lenei ua valaauina o ia e le Atua o loo la tauaveina lava.

O lo la mafaale sa i ai lava i le amataga o le atinaeina o le ekalesia ina ua siitia mai i lona nofoaga i Lugarno, Sini. O le tele o lo la soifua auauna na galulue ai i le taitaiga a le Susuga i le Toeaina Faatonu ia Taeipo Malifa FT ua tumalo ma le Faletua ia Sitaua. Lea na molimau ai le Faletua Malolo ia Sitaua i le Lotu Faaleaiga e tusa ai ma lona soifua auauna. Na taua ai o se tagata e fai mea fiafia ma e galue lelei. E le tele ni ana tala ae e i ai ana taleni i le faafiafia ma le pese. O se tamā e alofa tele i lana fanau ma si ona toalua.

E ma te taunuu i le aulotu nei i le 2023 o feagai o ia ma gasegase o le tino. O le mafuaaga foi lea e tau le maua ai se avanoa e sau ai i le lotu ma mea fai a le ekalesia. Ae o Lotu Tamaiti e sau ai lava e molimauina tauloto ma pese a si ana fanau. E le mafai lava foi ona faatamala i laua ma Faaititi i mea fai a le Ekalesia aemaise le tautuaina o lo laua tofi Tiakono.

O lona Sauniga Faaleaiga sa faia i le Malumalu a la matou aulotu i Lugarno i le afiafi o le Aso Tofi, 25 Setema 2025 i le itula e 5pm. Sa ou taitaiina ae fesoasoani ai nisi o Faifeau a le aiga sa auai. A o ona Toe Sauniga, sa faia lea i le Aso Faraile, 26 Setema i le South Chapel Memorial Ave, Rookwood, NSW. Na taitaiina e le Toeaina Faatonu (Matagaluega a Niusaelese), Susuga i le Faifeau Toeaina ia Iakopo Leleimalefaga (FT). O Susuga i Faafeagaiga o le Pulega na fesoasoani i le Sauniga - Pasefika Maiava (FS) – Lauga, Lagaata Gase (FS) – Tatalo, Auatama Iese (FS) – Faitauina o le Tusi Paia. O a'u na faaulufaleina lona sa mo ona toe sauniga. O le Faletua ia Faaititi Wilson na saunia le molimau o le Tiakono

ia Leota, a o a'u sa faia lona molimau faaleagaga. Na faatinoina uma i le maota tapuai ona toe sauniga. Na matou faamavae atu ai lea ia Leota ma tuuina atu ai loa lona tino maluu mo le faaliu efuefuina. Tofaina oe Leota. Alu atu ia i lou Alii ma le fiafia. O lē sa e auauna ai ma le fiafia a o tatou mafuta ai i lenei ola. Manuia tele lau malaga.

Saunia Susuga Makesi Neemia (FS)
EFKS Sydney, Pulega Sini i Saute
Matagaluega NIUSAUELESE

OSIGA FEAGAIGA VAILOA UTA

faapea Komiti Faatonu o Faleata, Misipalauni Faatau FT (o ia na faia le tatalo e faapaia ai le faifeau ma le faletua), Komiti Faatonu o Malua susuga Fili Si'a Matalavea FT, Kereta Fuafiva FT, Faasavala Leilua FTPenisione, Tiakono Toeaina Apia Sasa'e Mau'u Siaosi, Failautusi Matagaluega Faleata Amosa Reupena FS, Failautusi Pulega Faleata Sisifo Reupena Nofoaiga FS & Tausi Matagaluega Ekalesia Metotisi Vailoa, na fai ma sui o le Faapotopotoga ma le Ekalesia Aoao, e faafeiloa'i aloaia ma faamanuia le susuga Faafeagaiga ma le Faletua e ala i le faatalofa, opoopo ma le sogi paia. Na auai foi le mamalu faalemalo, le afioga i le Sa'o Faapito ia Hon. Fiamē Naomi Mataafa mai le aiga o le Faletua ia Naomi, faapea le Faipule ia Mau'u Siaosi MP, o le Tiakono Toeaina Apia Sasa'e.

Na faaopoopo le Upu faala'ei'au a le Ta'ita'i o le Sauniga, e ala i le a'oa'oga a le Alii o Iesu i lana poloaiga faataoto i ona soo, *Mataio 10:16, "Faauta, ou te aau atu ia te outou e pei o mamoe i le va o luko; o lenei, ia outou atamamai e pei o gata a ia fifelemu e pei o lupe."* Na taualuga le sauniga i le Sakarameta o le Talisuga Paia a le Alii na ta'ita'i e Tavita Pulu FS, a e tautu e Tiakono Tina e to'afa o Vailoa uta. Ona afe ane lea o le aofia e tali le valaau fa'aaloalo a le Ekalesia ma aiganalua, i le taumafataga ma fa'aaloaloga masani. Na faai'u le aso ina ua folasia le IE o le feagaiga, o le Pulu ma le Leuleu, na saunia e le paia o Aiganalua.

O Tavita ma Naomi ua sui tulaga ia Nouata ma Fa'ao Saifoloi ina ua maluu Nouata i le 2024. Ua to'a tolu ai nei faifeau o lea Aulotu talu ona faavae, i le vaiata o le 1990s, ma lona uluai faifeau (ua maluu) ia Faapaia & Sina Tariu. Ia faamanuia le Atua i le galuega, ma ia ia te Ia le viiga. **(F. Tolua)**

LEOTA PHILIP WILSON



FALETUA O LE LAUMUA



**Faletua A'oa'o Malua, i le Sauniga
Lotu o le Poloketi Onesemo**



O Lupe a Tulaele, mavae i le oti



Sui o le EFKS Vailoa uta, 31/10/2025



Nisi o le aufaigaluega na molimauina le osiga feagaiga EFKS Vailoa uta.